


KULUNGA

 . . . Mpe kuvwanda awa samu na kusambila kintwadi na beno. Mpe ntangu yayi na ntwala ya Nsangu, mu kele na nkundi ya munu ya mbote awa na estrade na nkokila yayi, Docteur Lee Vayle, ya dibuundu ya Ntete ya ba-Baptiste na Lima, na Ohio, yina vwandaka mosi ya ba-sponsor ya munu na lukutakanu ya Lima. Mu yufulaka yandi, ntangu mu vwandaka kwisa na nkokila yayi, kana yandi lendaka kaka kutuba mpova mosi na dibuundu, ntangu yankaka samu na kusimbisa lukutakanu ya Lima, na ntangu ke kwisa to zole. Mpe mu ke na kiese, mu ke na kiese na kukotisa na beno na nkokila yayi, Docteur Lee Vayle, Baptiste yankaka yina me kuzwa Mpeve-Santu.

² [Mpangi Lee Vayle ke na kutuba baminuti kumi na yiya, samu na kupesa kimbangi ya bantu mingi yina me beluka.—Mu.] Amen. Nzambi sakumuna nge, mpe, Mpangi Vayle.

³ Yina me vwanda ngolo mingi samu na pasteur ya Baptiste, mutindu yina ve? Mbote, beto kele na kiese mingi na kuvwanda na Mpangi Vayle na beto. Mpe ya kieleka bielo kele ya kuzibuka samu na yandi na kuvutuka mpe kutala beto na konso ntangu yina yandi me zola. Mpe ntangu yayi na nkokila yayi . . .

Mbasi na nkokila kele *Kutulama Na Ntoni* ya Mfumu Yesu.

⁴ Lumingu na suka ke vwanda lukutakanu ya kubasika ya ntangu na ngunga ya sambanu. Mpe mu ke kwikila ti mpangi-bakala me zabisa na ndandani ya balukutakanu yina ke kwisa na ntwala.

Ntangu yayi beto sambila kaka mwa ntangu fioti.

⁵ Nzambi ya kusakumuka, Ndinga ya Nge kele Kieleka, mpe beto ke vtula matondo samu na bantu yina ke nataka Yawu, kukondwa boma, mutindu ba me pesa Yawu na bantu. Mpe mutindu beto ke zibula Biblia na nkokila yayi, to beto ke zibula ba-page ya Yawu, bika ti Mpeve-Santu ya kusakumuka kukwisa mpe kuzibula na beto Ndinga ya lubakusu. Na nzila ya Yesu Klisto, beto ke lomba yawu. Amen.

⁶ Na mpimpa yayi ya nene beto ke kembila, kukomama na kulunsi ya Mfumu ya beto ya nkembo, mu ke zola kutanga na nkokila yayi na bikoba ya Yandi Mosi ya ntalu, Bandinga yina Yandi me sonika na Buku ya Yandi. Na Santu Matthieu, kapu 4, beto . . . mpe nzila ya 47 mpe nzila ya 48, beto ke tanga mutindu yayi:

Mpe kana beno ke pesaka mbote kaka na bampangi ya beno, wapi diambu ya ngitukulu beno ke salaka? ya kieleka bilokoti-mpaku ke salaka ve mutindu yina?

Kasi beno vwanda bantu ya kulunga mutindu Tata ya beno yina kele na mazulu kele ya kulunga.

⁷ Mpe na nkokila yayi beto me zabisa ti beto ke tuba na zulu ya dilongi ya *Kulunga*. Ntangu yayi beto . . . Ya ke monana mutindu masonama ya ngitukulu samu na nkokila ya kukomama na kulunsi ya Mfumu ya beto. Kasi bubu yayi, ntangu yankaka, beno me kuwa na radio, mpe beno me kuwa bansangu ya mutindu na mutindu mpe minati nsangu ya mutindu na mutindu, wapi mutindu ba talisaka kilumbu ya kiadi ya nene ntangu Mfumu ya beto kufwaka samu na masumu ya yinza. Na yina mu me soola, na nkokila yayi, na kukwenda na mutindu yankaka samu na kukuma na yawu, na yina ya ke vwanda ya kuswaswana fioti mpe fwana yangidika beno mwa fioti. Mpe ti Mpeve-Santu ya nkembo kutwadisa Ndinga na kimpeve ntangu yayi mutindu beto sala ngolo na kulonga Yawu.

⁸ Nzambi ke lombaka kulunga. Beto zola simba yawu na mabanza, ti kima mosi ve ya ndambu lenda kwenda na Ntwala ya Nzambi. Ya fwana vwanda ya kulunga, kusambila ya beto, bima nionso.

⁹ Ntangu yayi, na disamba ya Eden, Nzambi vwandaka na Adam na Eve na kati ya disamba. Mpe ba sumukaka mpe kufwaka misiku ya Nzambi, na nzila ya disumu, kukolama. Mpe ntangu ba kufwaka musiku, kukolama kele kufwa ya musiku. Mpe musiku ya Nzambi, Yandi yina kele santu, busantu ya kuvedila, na yina ata kitini ya mvindu lenda ve kutelama na Ntwala ya Yandi. Na yawu, kana disumu kwisaka na yinza na nzila ya kufwa musiku, na yina disumu fwana sungama na ntwala nsumuki lenda telama na Ntwala ya Nzambi.

¹⁰ Ntangu yayi, kana ya ke na musiku ve, na yina ludedomo kele ve. Kasi musiku me lomba, to, ludedomo ke lomba musiku. Mpe musiku, ntangu ba me—ba me bokila yawu, ya ke twala na ludedomo.

¹¹ Ntangu yayi, na nzila ya musiku, ata nsuni mosi ve kuvulukaka. Ntangu yayi, musiku lendaka ve kuvulusa beto. Musiku vwandaka diambu yina kotisaka beto na boloko, kasi ya kele na ngolo ya kuvuukisa ve. Musiku talisaka beto ti beto vwandaka bansumuki, mpe fundisaka beto. Yawu yina musiku fwana kusala. Ya kele kunata lufundusu, to kotalisa na beno kisika yina kifu ya beno kele. Na yawu musiku, na yawu mosi, lendaka vulusa ve. Ya lendaka fundisa kaka.

¹² Mpe Nzambi, na kuvwandaka ya santu mpe ya kusungama, Yandi zolaka vwanda na lufundusu mosi. Yandi zolaka kufundisa nsumuki samu yandi lutaka bandilu ya lemvo, mpe kumaka muntu ya yinsi yina ke zitisaka ve musiku. Na yina, ba fwana sungika yawu.

¹³ Mpe musiku nionso ke vwandaka na kitumbu, na yina, kitumbu ya kufwa musiku ya Nzambi kele lufwa. Mpe ya nataka

lufwa na bantu. Mpe bantu nionso kele na nsi ya kitumbu ya musiku yayi.

¹⁴ Ntangu yayi, ntangu Adam na Eve sumukaka, ya vwandaka na nzila ve, ya vwandaka na nkisi yankaka ve yina ba lendaka simba na Ntwala ya Nzambi diaka, katula kaka kusungika disumu yayi. Mpe muntu mosi ve lendaka sala disumu ya konso mutindu yina, ya vwanda ya fioti to ya nene, disumu ya muntu yina fwana kusungama na ntwala muntu yina salaka yawu lendaka kwisa na Ntwala ya Mpeve ya Nzambi.

¹⁵ Na yawu, mpamba ve, ntangu Adam na Eve sumukaka mpe kufwaka musiku, ba vwandaka bantu ke kufwa. Mpe musiku fwana sala kusalu, na yina ya ke tula bantu nionso na nsi ya kitumbu ya lufwa. Ntangu yayi beto lenda kaka kuvwanda na mwa bantangu fioti ntangu yayi, na kati ya mabanza ya beto, mpe kutala kifwani yayi ya nene, mpe beno bambuka moyo ti muntu nionso awa diambu yayi me tala yandi. Bakala nionso mpe kento nionso, mwana, kitumbu ya lufwa me tala yandi, na nzila ya kufwa musiku ya yintu ya bantu, Adam; na ntangu yandi kufwaka musiku, beto nionso salaka disumu.

¹⁶ Mpe disumu fwana kusungama. Mpe na yawu, Nzambi, na seko ya Yandi ya nene mpe na zola ya Yandi ya nene. . . Musiku vwandaka kukabula nsumuki na Kiyidiki ya yandi; na yina yandi kumaka ya kubwa, mpe nyonso ya kubwa, ya vwandaka ve na mutindu ya kuvutuka na nganda ya kusungika disumu yina. Mpe ya zolaka vwanda kieleka kukondwa mpasi na ntangu yina na kukwikila na kubwa nyonso ya nsumuki na nsuka, samu yandi vwandaka me kabwana ya muvimba, kukonda nsuka na Ntwala ya Nzambi.

¹⁷ Ntangu yayi beno tala disumu yayi. Mpe wapi mutindu Nzambi, na kuvwandaka ya kusungama, mpe Yandi lendaka sala kima yankaka ve kasi kuvwanda ya kusungama, samu Yandi kele yinto ya kieleka nionso, na yina Yandi zolaka kusala kima yankaka ve kasi kutula kitumbu samu na kufwa ya musiku yayi. Mpe kitumbu vwandaka lufwa, samu Yandi tubaka, “Kilumbu yina beno ke kudia yawu, ya kieleka kilumbu yina beno ke kufwa.” Ntangu yayi, ya kele kifwani mosi ya ndombe beto ke na yawu awa.

¹⁸ Kasi na yina kana beto ke vutuka kaka na manima fioti, mpe beto ke mona kieleka bisalu ya Nzambi, Biblia pwelele ke tuba na beto ti “Nzambi kele zola.” Kasi na yina, na kuvwandaka zola, Yandi fwana vwanda ya kusungama. Na yawu, zola ke zola kutuba ve kima yina ba lendaka kuleba mpe kusakana na yawu. Zola kele ludedomo ya Nzambi.

¹⁹ Ntangu yayi, ntangu Nzambi monaka bana ya Yandi me kufwa musiku ya Yandi, mpe na yawu bawu fwana kufwa, na yina zola ya nene me kota na kati samu na kusala nzila. Na yawu, Nzambi monaka ti bana yayi zolaka vwanda kieleka, ya kubwa

ya muvimba na Ntwala ya Yandi. Ya vwandaka diaka ve na kima yankaka ya kusala, samu bawu kufwaka musiku ya Yandi, mpe kitumbu ya musiku ya Yandi vwandaka lufwa.

²⁰ Na manima zola ya Nzambi basikaka samu na bantu ya Yandi. Mpe ntangu zola ya Kinzambi me pesama, lemvo ya nene ke basisa kima ya zola. Mpe Nzambi, na nzila ya luzabu ya mantwala, ntangu Yandi zolaka bantu ya Yandi mingi; na yina, na kitumbu, Yandi salaka ti lufwa ya kima yankaka kubaka kisika na disamba ya Eden. Ya vwandaka, Yandi yingisaka kivangu yina kuzaba diambu ve, mwa mwana-dimeme yina me zaba disumu ve, mpe ya kwendaka samu na kuyingisa kima, kusala mpe kufwa na kisika ya nsumuki yina me kubwa. Mpe ya vwandaka mwana-dimeme, ya kufwa, samu na kupesa luzingu na bantu ya Yandi.

²¹ Na kati ya Ngwisani ya Ntama ba vwandaka kupesa menga ya bana-mameme mpe ya bankombo, ya mameme, ya bangombe mpe ya bana ya bangombe, kuyingisa ya lufwa. Kasi, kuna na kati ya économie ya nene ya Nzambi, Kima ya kieleka vwandaka kwisa na kati ya mabanza ya Yandi, yina zolaka vwanda. . . Ya vwandaka bivudi ya Kima ya kieleka yina vwandaka kwisa. Mpe Kima ya kieleka zolaka kwisa, vwandaka Mwana yina basikaka na Yandi. Bana-mameme nionso yina kufwaka vwandaka kaka kivudi. Mpe kivudi kele kaka yinweka ya zole ya kima mosi. Mpe ba vwandaka tubila kaka nkwezulu ya Calvaire.

²² Ntangu yayi samu na kifwani ya yayi, beto zibula ba-Biblia ya beto, na Buku ya ba-Hebreux, mpe beto vutukila awa yina Paul, ntumwa ya nene me tuba, samu na kumeka kukabula bima yayi samu na beto. Na kapu 10 ya Buku ya ba-Hebreux, beto ke tanga yayi.

²³ Mpe mu ke zolaka kaka Ndinga! Ndinga kele Kieleka. Mpe mu ke zolaka kutanga Yawu na ntwala ya dibuundu ya munu, samu mu zaba ti na lusambusu mu ke telama na bawu. Mpe mu ke pesa mvutu. Na yawu kana mu ke longa Yawu landila Ndinga, na yina mu ke sumuka ve; samu Yawu kele Ndinga, mpe Nzambi kele na kiyeka ya Ndinga ya Yandi.

²⁴ Beto ke mona mingi ya ba-évangéliste bubu yayi, mpe nionso yina, yina me tungama na bapersona. Oh, ya kele diambu ya nsoni! Mpe beto ke mona ti, ntangu beto ke kwenda na mabuundu, beto ke kota na yinzo-Nzambi mosi mpe beno ke mona pasteur mosi, yandi kele na mwa mambu yina yandi ke sala, mwa émotion. Kana beno zaba ve, dibuundu ya muvimba ke baka mpeve yina. Kana yandi kele muntu ya émotion, to yandi ke ningisa yintu ya yandi, to yandi ke sala mwa kima mosi ya ngitukulu, mbote, dibuundu ya muvimba ke sala mutindu yina. Mpe beto me kuma, bubu yayi, na mabuundu ya beto ya bilumbu yayi, kisika ba-sensation mpe mwa bima ya mutindu yina kele. Mpe ya ke nata muvusu ya nene! Kasi, oh, bampangi ya munu

ya luzolo, kana ya me vwandaka ntete ve na ntangu yina beto lendaka vwanda na Ndinga, ya kele bubu yayi!

²⁵ Beno me mona, mu ke zola ve kuluta na lusambusu mpe kuzaba ti mu vwandaka na mwa luzayikisu mosi ya kudiengana, mpe mu me twadisa bantu na nzila ya yimbi. Mu ke zola ve ti bawu kuvwanda na mpeve ya munu na zulu ya nsalulu ya munu, kasi mu ke zola ti bawu kuvwanda na Mpeve ya Nzambi na nzila ya Ndinga ya Nzambi, yina ke butaka Kieleka.

²⁶ Na yawu na dibaku yayi ya nene na nkokila yayi, mu ke zola kutanga na Ndinga ya Kukondwa nsuka ya Nzambi. Ntangu yayi beto ke mona ti musiku vwandaka bamvula mingi, kasi musiku lendaka kukatula disumu ata fioti ve. Mutindu mu tubaka na ntangu me luta, ya vwandaka kaka yinzo ya boloko. Ya vwandaka pulusu ya nene yina vwandaka tuba na beno yina beno salaka, kasi vwandaka ve na nkisi ya kukangula beno. Ya tulaka beno na yinzo ya mfuka, kasi ya vwandaka na Muvuukisi ve samu na kubasisa beno, na yawu. Ya vwandaka tula beno kaka na boloko, samu na kuzabisa beno ti beno vwandaka nsumuki. Kasi ntangu yayi beno tala na ba-Hebreux, kapu 10, mutindu beto ke tanga.

Musiku kele kaka kivudi ya bima ya mbote yina ke kwisa, mpe yawu ke lakisaka ve kifwani ya kieleka . . .

²⁷ Beno bambuka moyo, ya vwandaka kivudi ya kifwani yina ke kwisa. Kivudi ke talisaka kaka ti ya kele na kifwani mosi ke na kusalaka kivudi. “Kivudi ya bima yina ke kwisa, mpe ya kele kifwani ya kieleka ve.” Beno tala, “ya bima . . .”

. . . kifwani ya kieleka ya bima yina, yawu lenda kusala ve ti bayina ke na kukwenda na sika . . . kusala ntangu nyonso yina ke kwiza na ya kulunga.

²⁸ Ntangu yayi, Nzambi, na mbandukulu, lombaka kulunga. Yesu, ntangu Yandi kwisaka na ntoto, Yandi tubaka, “Beno vwanda ya kulunga, mutindu Nzambi na Zulu kele ya kulunga.” Mpe musiku, vwandaka kivudi ya bima yina vwandaka kwisa, yawu lendaka ata fioti ve kusala ti musambidi kuvwanda ya kulunga. Beno me simba kifwani yango? Ntangu yayi beto baka diaka yawu samu ti beno lenda ve kukondwa yawu. Nzambi ke lombaka kulunga ya busantu. Muntu mosi ve lendaka telama na ntwala ya Yandi, na mwa ditona ya disumu. Yesu pesaka kimbang'i ya mutindu mosi, mpe tubaka, “Beno vwanda ya kulunga, mutindu Nzambi na Zulu kele ya kulunga.”

²⁹ Mpe Biblia me tuba ti, “Musiku lendaka ata fioti ve, na minkayulu ya yawu, kusala yina ke kwisa kuvwanda ya kulunga.” Na yina, musiku lendaka kukumisa ata kima ve ya kulunga. Ya vwandaka kaka kitadisi. Minkayulu yayi, ba vwandaka sala konso mvula, lendaka ata fioti ve kukumisa musambidi ya kulunga. Na yina, ata mosi ve na nsi ya musiku,

to na kukebaka misiku, to na nsi ya bivudi, lendaka vwanda ya kulunga.

Na yina (nzila ya 2) *na yina bantu zolaka pesa diaka ve munkayulu? . . .*

³⁰ Kana ya vwandaka na kima mosi yina mu lendaka sala samu kukikumisa ya kulunga munu mosi na Ntwala ya Nzambi, na yina Klisto zolaka kufwa ve samu na munu. Kana ya kele na kima yina beno lendaka sala, yina zolaka vwanda na ngolo ya beno na Ntwala ya Nzambi, na yina Klisto kufwaka na mpamba. Ya kele na kuzitisa musiku ve, na mabanza ya beno ya misiku ve, ata busantu ya beno ve, ya kele na bima yina beno lendaka yambula ve na kusala, kuyambula kutuba luvunu, kuyambula kuyiba, kuyambula kunwa fumu, kuyambula kukwenda na kisika ya bizizi, beno kele kaka ya kuzimbana. Kima mosi ve lendaka sala yawu! Kukota na mabuundu, na binkulu, bankinzi, bambotika, bantumunu ya dibuundu, kutanga ya ba-credo, kuvukila bisambu, bima yina nionso ke na mfunu ve. Beno kele ya kuzimbana! Ya kele na kima mosi ve beno lendaka sala na beno mosi, samu beno kele nsumuki na nsi ya lufundusu. Mpe ya kele na mutindu ve na beno mosi, to konso credo yina, to kima yina beno lendaka sala to kubanza, ya beno mosi, yina lendaka vwanda na ngolo ya beno na Ntwala ya Nzambi, samu beno kele nsumuki na kubanda.

³¹ Mpe Biblia me tuba ti beto nionso me butuka na disumu, beto me salama na disumu ya nkú, beto me kwisa na yinza na kutubaka baluvunu. Mpe Nzambi lendaka ve kubaka muntu mosi samu na kufwa samu na bantu yankaka, samu muntu mosi kele ya kubwa mutindu muntu yankaka. Na Ntwala ya Nzambi, archevêque yina me butuka na yinza yayi kele ya kubwa mutindu nzinzi ya bar ya nsi mingi na kati ya mbanza. Muntu ve lenda yidika foti ya muntu yankaka.

³² Na yina, Yandi bakaka luzingu ya niama yina me zaba diambu ve, mwana-dimeme ya fioti. Mpe na Ngwisani ya Ntama, musiku vwandaka ti, ntangu muntu vwandaka sumuka, yandi vwandaka nata mwana-dimeme na autel. Beto tuba kana yandi kufwaka mosi ya misiku, yandi vwandaka nata mwana-dimeme mpe yandi vwandaka tulula yawu na zulu ya autel, yandi vwandaka tetika maboko ya yandi na zulu ya mwana-dimeme mpe yandi vwandaka fungula masumu ya yandi, ti yandi salaka yimbi mpe yandi zabaka ti yandi vwandaka ya kubwa. Ya . . . mpe vwandaka . . . Musiku lombaka lufwa. Mpe yandi nataka mwana-dimeme na kisika ya yandi. Mpe ntangu yandi . . . Ba vwandaka zenga laka ya mwa niama yina, mpe ya bandaka na kubula mwa makulu ya yandi, mpe ya vwandaka basisa menga. Kana beno me monaka ntete ve mwana-dimeme yina ba me kufwa, ya ke vwandaka na kuboka ya mawa! Mwa niama yayi ya fioti ke meka na kudila, mpe ba ke zenga mwa veine jugulaire ya yandi. Mpe mutindu yandi ke bula makulu mpe yandi ke

ningana, mpe mutindu yandi tanduluka, na manima yandi ke ningana diaka mpe ke dila. Mpe menga ke basika, ya ke tiamuka na mwa mika ya yandi mpe na maboko ya musambidi.

³³ Mpe na yina musambidi ke ndima, yandi salaka pité, yandi tubaka luvunu, yandi yibaka, nionso yina yandi salaka, to ata mpe dibanza ya yimbi, konso kima yina ya vwandaka na mwa kivudi ya fioti, yandi vwandaka ya kubwa, samu ya vwandaka nkadulu ya yandi. Yandi vwandaka muntu ya kubwa, ntangu yankaka na nzila ya nsatu ve. Mpe yandi vwandaka ndima ti mwana-dimeme yayi ya fioti yina me zaba diambu ve me kufwa na kisika ya yandi. Mpe yandi monaka kiadi samu na mwa kima ya fioti.

³⁴ Kasi muntu, na yina ntangu mwana-dimeme kufwaka, na menga ya mwana-dimeme na zulu ya maboko ya yandi, yandi vwandaka basika na kivinga na nsatu yina mosi na kati ya ntima ya yandi, yina yandi vwandaka na yawu na mbandukulu. Samu na yinki? Samu luzingu yina vwandaka na kati ya mwana-dimeme yayi ya fioti. . . Luzingu ke vwandaka na kati ya menga. Luzingu ya beno kele na kati ya menga ya beno. Beto me zaba yawu. Mpe luzingu yina vwandaka na kati ya menga ya mwana-dimeme vwandaka luzingu ya niama, na yina ntangu mwa binama ya yandi ya fioti kubukanaka mpe luzingu basikaka na niama, ya lendaka ve kuvutuka na musambidi, samu musambidi vwandaka muntu.

³⁵ Menga vwandaka kufika, kasi ya lendaka ve kuyidika foti na mutindu ya kulunga; samu muntu vwandaka basika na kivinga na nsatu mosi ya kusala disumu, mutindu yandi vwandaka na yawu na kisika ya ntete. Kasi, na kusalaka mutindu yayi, yandi vwandaka tala na ntangu yina ya ke vwanda na Mwana-dimeme ya kulunga yina ke kwisa. Mpe yandi vwandaka sala yawu na zulu ya dikabu ya kuyoka, samu ya vwandaka mutindu mosi kaka yandi zabaka samu na yawu.

³⁶ Na yawu, beno me mona, ntangu menga vwandaka tiamuka, mpe luzingu basikaka na niama, ya lendaka ve kuvutuka na muntu; na yina, mosi vwandaka niama, mosi vwandaka muntu; niama yina me zaba diambu ve, samu na muntu ya kubwa.

³⁷ Kasi, oh, kilumbu mosi, bamvula mafunda zole me luta, Mwana-dimeme ya Nzambi butukaka kuna na kati ya kidikilu na Bethlehem, mpe ba vwandaka twadisa Yandi mutindu dimeme na abattoire ya yawu. Mwa bamvula funda mosi na nkama yivwa me luta, na manima ya midi yayi, na ngunga ya tatu Yandi kufwaka. Mpe Mwana-dimeme ya Nzambi ya kukondwa mvindu, ya kukondwa foti vwandaka kuna na zulu ya kulunsi ya Calvaire mpe Yandi kufwaka samu na nsumuki nionso. Na yina musambidi ke kwisa na Mwana-dimeme yayi, na nzila ya lukwikilu! Mpe yayi kele Mwana-dimeme ya kuswaswana. Ya kele ve Mwana-dimeme mutindu bayankaka.

38 Ata muntu mosi ve lendaka kwisa na Mwana-dimeme yayi, kana Nzambi me bokila yandi ntete ve. Beno me mona ngolo nionso ya Nzambi? Oh, mu ke banza ti yayi ke kota na mudindu ntangu yayi. Beno tala. Nzambi zabaka ti Yandi vwandaka na dimeme na yinza yayi. Yandi zabaka ti Yandi zolaka vwanda na bantu ya kuvulusa, mpe zola ya Yandi talaka na nsi mpe monaka bayina ke vuluka; na yina, na nzila ya luzabu ya mantwala, Yandi zabaka na ntwala Dibuundu samu na kukutana na Yandi kuna, kukondwa mvindu to mifutu. Mpe kana Nzambi lombaka Dibuundu ya kukondwa mvindu to mifutu, Yandi zolaka vwanda na kima mosi samu na kusala yawu mutindu yina. Yandi lendaka kulomba yawu ve, kieleka ya Yandi, balusambusu ya Yandi lendaka ve kubika Yandi lomba kima ya mutindu yina kana ya vwandaka ve na mutindu ya kusala yawu.

39 Mpe muntu lendaka ve kusala yawu na yandi mosi. Ya kele kubwa ya muvimba. Nzambi ke bika yandi kumona yawu na nzila ya musiku, na nzila ya bazuzi, mpe na nzila ya Ngwisani ya Malu-malu ya muvimba. Yandi fidisaka bapofete, Yandi fidisaka muntu ya kulunga, mpe bawu monaka ti muntu nionso vwandaka ya kubwa.

40 Na yawu, Nzambi, na nzila ya lemvo ya Yandi ya ngolo nionso, Yandi fidisaka, katuka na mielo ya Nkembo, Mwana ya yandi mosi kaka, samu na kubaka kisika ya beto.

41 Beno bambuka moyo, kana Yandi zolaka kutuba na pape ya Rome na kusala yawu, yandi lendaka ve kusala yawu. Kana Yandi zolaka kutuba na archevêque ya Canterbury na kusala yawu, yandi lendaka ve kusala yawu. Kana Yandi zolaka bokila tata révérend ya kulutila busantu to évêque ya yinza, yandi lendaka ve kusala yawu. Ba zolaka losa yandi mutindu Judas Iscariot vwandaka. Yandi lendaka ve kusala yawu, samu yandi vwandaka “me butuka na disumu, yina me salama na disumu ya nkú, yina me kwisa na yinza na kutubaka baluvunu,” mpe yandi vwandaka na nsatu ya mulemvo ya masumu yandi mosi.

42 Alleluia! Kasi Mosi katukaka na mielo ya Nkembo; muntu yankaka ve, muntu mosi ve, muntu mosi ya mbote ve, to Juif mosi ve to Muntu ya makanda mosi ve. Ya vwandaka kima mosi ve kasi Nzambi ya Ngolo nionso, yina me bumbama na kati ya nzutu. Yandi kwisaka, Yandi mosi, samu na kupesa Menga ya Yandi Mosi, samu Yawu zolaka ve kukwisa na nzila ya sexe. Sexe zolaka ve kusala kima mosi na yawu. Kasi Yandi fikaka mwense mosi na kivudi, mpe basisaka na cellule ya Menga yina Yandi vangaka, Yandi mosi, Yandi yina me zaba diambu ve.

43 Na yina mpulusu ya munu, ya beno, na nkokila yayi, kele ve na zulu ya bangolo ya bisalu ya beto. Yawu kele na zulu ya lemvo ya mbote ya ngolo nionso ya Nzambi ya Ngolo nionso Yina solaka beto kati na Yandi. Ya kieleka. Mu lendaka ata fioti ve kuvwanda ya kulunga, to beno zolaka ata fioti ve kuvwanda ya

kulunga. Mpe beto ke tuba ve ti beto kele ya kulunga. Kasi beto kele na kivuvu yayi, ti, lukwikilu ya beto me pema na Munkayulu ya kulunga yina ba me ndima!

⁴⁴ Na yina wapi mutindu beto me zaba ti beto kele na Yawu? Na ntangu musambidi ke tula maboko ya yandi, na nzila ya lukwikilu, na zulu ya nzutu ya Mfumu Yesu, mpe vwandaka na boma ya nene ya disumu, mpe kuwa luvwezo ya mate na kizizi ya yandi, kuwa kuboka ya Gethsemane, bampasi ya Calvaire, mpe kuzaba ti yandi kele ya kubwa, mpe kufungula masumu ya yandi mbote-mbote, “O Mfumu ya Kusakumuka, mu kele ya kubwa. Mpe mu ke na mutindu yankaka ve kasi Nge samu na kusadisa munu. Mpe na lukwikilu . . . Beno ke bondila, Mpeve-Santu, na kukwisa mpe kuwa munu. Mpe ntangu yayi, na lukwikilu, mu me ndima Yesu mutindu Mvulusi ya munu mosi.” Luzingu yina me katuka na Yandi na Calvaire, yina ba me bokila Mpeve-Santu, yina vwandaka ya kubumbama na cellule ya Mfumu Yesu, ke vutuka na musambidi mpe ke botika yandi na Mpeve-Santu, kati na Nzutu ya Klisto.

⁴⁵ Mpe ba me sambisa Yandi dezia. Beno lenda ve kuvwanda na boma ya lusambusu. Na yina mu ke baluka mpe mu ke tala na mwa kulunsi yina, mu ke ndima ti ya ke . . . talisa nzutu ya Yandi. Mpe ntangu yayi ba me sambisaka dezia nzutu yina. Ya kieleka Nzambi lendaka diaka ve kusambisa yawu, samu ba me sambisaka yawu dezia. Nzambi bulaka balusambusu ya lufwa na zulu ya nzutu yina. Mpe na yina mu lenda mona nzila samu na kukota na nzutu yina! Lusambusu ya Yandi bulaka samu na munu mpe samu na beno. Beto kele na kimpwanza! Romains 8:1, me tuba, “Ntangu yayi bayina kele ya kukangama na Yesu Klisto lenda kuzwa diaka ve kitumbu, na kutambula ve landila nzutu, kasi landila Mpeve.” Yawu yina, ya ke na kitumbu ve! Mu ke kipe ve yina ke kwisa to yina ke salama, beno kele ya kubumbama na nsi ya Menga.

⁴⁶ Diaka, wapi mutindu beto ke kotaka na Nzutu yina? Ba-Corinthien ya Ntete 12:13, me tuba ti, “Na Mpeve mosi!” Wapi mutindu Mpeve ke kwisaka? Na nzila ya Munkayulu. Wapi kisika Mpeve ke vwandaka? Na kati ya Menga. Samu na yinki niama lendaka ve kuvutuka? Ya vwandaka niama. Mpeve ya niama lendaka ve kukwisa na mpeve ya muntu mpe kusala kima mosi na yawu, samu mpeve ya muntu vwandaka luzingu ya zulu mingi kulutila niama. Kasi mpeve ya muntu yankaka ve lendaka vutuka. Kana beno kele na mpeve ya nkooko mosi, ya kele bunganga. Kasi Nzambi Yandi mosi kwisaka, ti Mpeve ya Yandi Mosi, yina kele mpeve ya zulu mingi, lendaka vutuka na kifwani ya mbotika ya Mpeve-Santu, na musambidi, na nzila ya Menga ya Klisto, mpe kukotisa yandi na kati ya Nzutu yango. Yandi kele na lukengolo!

⁴⁷ Beno tala. Menga ya bangombe mpe ya bankombo lendaka sala ve, na kumonaka ti ya vwandaka ya kukondwa ngolo.

Ntangu yayi beto banda na kutanga, na nzila ya 12. Mbote mingi. Menga ya bangombe mpe ya bankombo lendaka sala ve, to lendaka ve kuyidika yawu. Beno tala.

Kasi muntu yayi, (Yinki Muntu? Evêque? Ve. Pape? Ve.) . . .

Kasi muntu yayi, na manima yandi . . . pesaka munkayulu mosi samu na disumu, yandi me vwanda na diboko ya kibakala ya Nzambi;

Katuka ntangu yayi yandi ke na kuvingila tii bambeni ya yandi ke kuma kinyatinu ya yandi.

⁴⁸ Beno me kukubama? Beno me kukubama samu na Ndinga? Beno kuwa Yayi, na yina mu ke lomba beno na kubika Yawu kukota. Beno kuwa na bukebi nionso.

Na yina na nzila ya dikabu mosi (ya kele ve mvula na mvula, ya kele ve reveil na manima ya reveil, ya kele ve lukutakanu na manima ya lukutakanu, ya kele ve kilumbu na manima ya kilumbu) . . .

Kasi na nzila ya dikabu mosi yandi me l-u-n-g-i-s-a (bawu me? Yandi me!) . . .

. . . na nzila ya dikabu mosi yandi me lungisa (yawu yina Nzambi me lomba) kukonda nsuka bayina ba me santisa.

⁴⁹ Beno me kuma kisika yango. Ya kele mvutu samu na lufwa ya Klisto. Ya kele mvutu samu na Calvaire. Yandi ya kieleka, na Menga ya Yandi Mosi, me sumba masumu ya beto, mpe me lungisa kukonda nsuka, bakwikidi ya Yandi. Na yina, kati na Klisto beto kele kukondwa foti, ya kulunga na Ntwala ya Nzambi ya Ngolo nionso. Beto kele bantu yina me kuzwa ntangu ya mbote, na malongi ya beto; ba me longaka beto nionso ti beto fwana kuma na kisika mosi, beto fwana sala kima mosi. Ve, mpangi ya munu ya bakala, ya ke na kima mosi ve beno me sala; ya kele yina Nzambi salaka samu na beno! Beto kele ntangu yayi, kana beto me nungisama na nzila ya lukwikilu, beto kele ya kulunga kukondwa nsuka na Ntwala ya Nzambi.

⁵⁰ Na yina Yeu tubaka, “Beno vwanda ya kulunga.” Na yina, ya vwandaka ya kulunga kukonda nsuka. Nzambi, na nzila ya lufwa ya Klisto, bamvula funda mosi na nkama yivwa me luta, bubu yayi, me lungisa mukwikidi, yina Yandi monaka na ntwala yinza kusalama, kukonda nsuka. Mpe bayina Yandi bokilaka, Yandi me nungisa bawu. “Bayina Yandi zabaka na ntwala, Yandi bokilaka bawu; bayina Yandi bokilaka, Yandi me nungisa bawu; bayina Yandi me nungisa, Yandi me kembisa bawu dezia.” Yandi me lungisa bakwikidi ya Yandi!

⁵¹ Ntangu yayi beno tala, beto vutuka ntangu yayi na nzila ya 1.

. . . Na yina musiku na kuwandaka kivudi ya bima ya mbote yina ke kwiza, mpe ve kifwani ya kieleka ya

*bima yango, lendaka ve na minkayulu yango yina bawu
vwanda pesaka mvula na mvula kulandila na kusala
yina vwandaka kwenda ya kulunga.*

⁵² Beno tala mbote “ya kulunga,” yawu yina beto ke na kutubila.

*Na yina bawu zolaka pesa diaka ve minkayulu? samu
bayina ke sambilaka Nzambi na mutindu yina kumaka
ya kuvedila na mbala mosi bawu zolaka zaba ti bawu ke
diaka ve na masumu.*

⁵³ Yinki ya zola kutuba? Mpova yayi *kuzaba* kuna, na yina, ntendulu, kele “nsatu.” Mpe kana muntu me kwisa, musambidi, na mutindu ya kieleka, na ntuala ya Klisto, na kumonaka mpasi ya Yandi, mpe yandi ke kukipesa yandi mosi na Klisto, mpe kutuba, “O Mfumu Nzambi, ya ke na kima mosi ve na kati ya munu yina lenda yidika foti ya munu, kasi mu ke tala ya muvimba na Nge,” na yina Mpeve-Santu ke kwisa kota na ntima ya muntu, diambu ya disumu me kusuka kukonda nsuka, samu nsatu nionso ya disumu me basika na beno. Na yina kana musiku lendaka kusala yawu, minkayulu ya bawu zolaka suka ve; kasi yawu na kuvwandaka yina lendaka ve na kusala yawu, Klisto kufwaka, samu na kukumisa beto ya kulunga.

⁵⁴ Bankundi, ya ke na mambu mingi yina beno lendaka tuba na nkokila yayi, na yina me tala kulunga. Beto ke meka ntangu nionso na kutobola meso ya muntu yankaka, samu na kukikumisa kaka ya santu mingi kulutula mutindu bawu kele—bawu kele. Kasi kana beto me tala kaka na kifwani, ya kele kaka lemvo ya Nzambi ti beto kele yina beto kele.

⁵⁵ Awa na mwa ntangu fioti me luta, na Ohio, mu me longuka dilongi mosi na mutindu ya mpasi. Mu vwandaka na lukutakanu kuna na Ohio, mpe mu vwanda vwanda na nganda ya mbanza. Samu na nkonga ya bantu, mu lendaka ve kuvwanda na mbanza.

⁵⁶ Beto vwandaka kudia na mwa restaurant ya Dunkard. Mpe ya vwandaka na mwa misadi ya bakento ya lutondo, mpe ba vwandaka lwata na mutindu ya mbote, mpe na bunkete mutindu ba lendaka vwanda, na nkadulu ya mbote, bawu vwandaka pesa beto madya. Ya vwandaka mwa kitini ya mazulu, samu na kudia na kisika ya mutindu yina. Kinkuku ya bawu vwandaka na bunkete mingi. Mpe na Lumingu ba vwandaka kanga mpe ba vwandaka kwenda na yinzo-Nzambi ya bawu. Mu kuwaka fyoti nsatu, mu zolaka longa na Lumingu na manima ya midi.

⁵⁷ Mpe mu kwendaka kuna na mwa . . . na mwa restaurant mosi ya ba-American yina me zabana, samu na kuzwa kima ya kudia. Mpe ntangu mu kotaka, yina mu kuwaka vwandaka kaka masini ya mbongo vwandaka sala! Mpe mu vwandaka ya kutelama kuna bakala ya bamvula ya munu, yina ntangu yankaka vwandaka bakala ya makwela, na diboko ya yandi na dipeka ya kento mosi, ke bula nsaka ya masini ya mbongo. Musiku ya beto, lukengolo

ya bumbote ya beto, ya bima ya beto, yandi vwandaka kuna ke vweza kima yina yandi zolaka meka na kukeba. Samu ti, ya kele na nganda ya musiku kubula bansaka ya mbongo na Ohio, kubula nsaka ya masini ya mbongo.

⁵⁸ Mpe mu balukaka mpe mu talaka kuna na manima ya kivinga, ya vwandaka na nkonga ya matoko ya bana-babakala, mpe roch-and-roll ya ntama na masini, vwandaka bula. Mama mosi ya ntwenia pene ya bamvula kumi na nana, ya mbote mingi na kutala yandi mutindu kento. Kasi yandi vwandaka ya kutelama kuna na robe ya yandi ya kubwa na ntwala, mpe mosi ya bana-babakala yina vwandaka me tula maboko ya yandi na zulu ya mwana-kento yango, kisika ba vwandaka ve na nsoni. Mpe ba vwandaka kunwa makaya mpe kunwa malafu.

Mpe mu banzaka, “O Nzambi, wapi mutindu Nge lendaka ndima yawu?”

⁵⁹ Mpe mu talaka kuna na diboko ya munu ya kibakala, na yina mu kuwaka muntu mosi kudila. Mpe ya vwandaka na kento mosi ya mbuta, mu banza ya bamvula makumi sambanu, to bamvula makumi sambwadi. Yandi vwandaka na mwa bilele yina ya mbote ve, kaka kitini ya bamambeke ya yandi, mpe mwa nzutu ya yandi ya mifutu vwandaka kaka pete mutindu ya lendaka vwanda. Mpe yandi vwandaka na rouge à lèvres na bikoba, mpe ya vwandaka na kima ya nene ya violet na lweka ya kizizi ya yandi, ya kupakula; ya kulwata mwa basapatu, ba-sandale, na manzaka ya violet, ya kupakula; manzaka ya misapi ya violet, ya kupakula. Mpe bansuki ya yandi vwandaka ya kuzenga nkufi mingi, mpe ya kunionga, mpe ya me tula mukubu ya bleu. Mpe mu talaka yandi.

⁶⁰ Mpe kuna na nsongi ya mesa vwandaka na babakala zole, ya kukola malafu. Mosi ya bawu (ya vwandaka na ntangu ya été) vwandaka me lwata kazaka ya ntama ya basoda, na lele ya laka na kizunga ya laka ya yandi, mpe ba-moustache na kizizi ya yandi, yandi vwandaka bioka mpe ntangu nionso. Mpe ba lombaka pardo bawu mosi, bakala salaka yawu, na yina, yandi bandaka na kutambula mutindu *yayi*, na kivinga ya kupema.

⁶¹ Mu telemaka kuna. Mpe mu tubaka, “Nzambi, samu na yinki Nge lendaka ve kubebisa kima ya muvimba? Samu na yinki Nge lendaka ve kudindisa yawu na nsi ya ntoto?” Mu tubaka, “Sarah ya munu ya fioti mpe Rebecca fwana kukula na diambu ya mutindu yina?” Mu tubaka, “Wapi mutindu Nge, Nzambi, na busantu ya Nge ya nene, lendaka ve kukanga ntima na kutala diambu ya mutindu yayi, mpe lendaka ve kufidisa kuningana ya ntoto mpe kudindisa yawu?”

⁶² Mpe mutindu mu vwandaka ya kutelama kuna, na kufundisaka kento yango, mutindu mu vwandaka kuna, mu kwendaka na manima ya kielo. Mu kuwaka Mpeve ya Nzambi me kwisa na munu, mpe mu kwendaka na manima ya kielo.

63 Mpe mu monaka mutindu ti kima vwandaka baluka. Mpe na yina ya vwandaka, na vision, ya vwandaka yinza vwandaka baluka mpe kubaluka. Mpe na yina mu talaka, na yinza ya muvimba ya vwandaka na nzila mosi ya mbwaki, na yinza ya muvimba. Mpe mutindu mu kumaka na yinza, mu monaka munu mosi, mwa mwana mosi ya bakala, ke na kusala mambu yina mu zolaka sala ve; ntangu yankaka mutindu *yina* ve, kasi ya vwandaka disumu. Mpe ntangu nionso mu vwandaka sala diambu, mu monaka ti ya vwandaka na kivudi mosi ya ndombe vwandaka kwenda na Zulu. Na yina, Nzambi zolaka kufwa munu na muniti yina.

64 Na manima mu monaka ya kutelama na kati-kati ya munu na Nzambi, ya kutelama Munkayulu yango ya kulunga. Mu monaka Yandi ya kutelama kuna na bibongo na yintu ya Yandi, mpe mate vwandaka kulumuka na kizizi ya Yandi. Mpe ntangu nionso masumu ya munu zolaka kukuma na ntwala ya Nzambi, Yandi lendaka kutanda diboko mpe kukanga yawu, mutindu pare-chocs na tomabilu. Yandi vwandaka keba munu na lufwa. Mpe ntangu nionso mu zolaka sala kima ya yimbi, Nzambi zolaka kufwa munu. Ya kieleka, busantu ya Yandi ke lomba yawu. Musiku ya Yandi ke lomba yawu. Mpe ntangu nionso yina mu vwanda zola kusala kima, to beno kusala kima, Menga ya Yesu Klisto ke sala mutindu pare-chocs. Mpe mu monaka ti nzila yina ya mbwaki zolaka kutuba ti, kuna, ti Menga ke na kusimba kaka ntoto.

65 Mpe mutindu mu telemaka, na kutalaka, mu kumaka pene-pene fioti na Yandi na yina mu talaka Yandi. Mpe mu lendaka kuwa Yandi kutuba, “Tata, lemvokila yandi, yandi me zaba ve yina yandi ke na kusalaka.” Mpe mu talaka, mpe ya vwandaka na buku mosi kuna. Mpe ya vwandaka na Wanzio mosi kuna yina vwandaka sonika, mpe yina vwandaka ya kutelama na lweka ya Yandi. Mpe ntangu nionso mu vwandaka sumuka, ba vwandaka sonika yawu na buku. Mpe nkumbu ya munu vwandaka na buku yango. Mpe mu monaka ti kilumbu mosi, munu . . . ba ke katula nzila yina ya Menga mpe mu ke vwanda na Ntwala ya Nzambi, na luzingu ya munu ya masumu. Kasi, mu monaka, na mawa ya Yandi vwandaka kanga lusambusu ya munu.

66 Mu kwendaka na Yandi, na kukikulumusa nionso. Mu fukamaka, mpe mu tubaka, “O Yesu, Nge Mwana ya Nzambi, mu me lunga ve na kukwisa na Ntwala ya Nge. Kasi Nge lendaka lemvokila munu samu na yina mu me sala?”

67 Yandi simbaka mpanzi ya Yandi na diboko ya Yandi, me baka buku ya ntama mpe me sonika “ya kulemvuka” na yawu, Yandi losaka yawu na manima ya Yandi, mpe masumu ya munu me kwenda! Na yina Yandi talaka munu, na nganzi na kizizi, Yandi tubaka, “Ntangu yayi mu me lemvokila nge, kasi nge ke zola kufundisa yandi.” Na yina mu monaka yina ya zolaka kutuba.

68 Na yina mu basikaka na vision, mu kwendaka na sika ya yandi. Mu tubaka, “Yinki mutindu?”

69 Yandi vwanda kunwa malafu. Yandi talaka munu, mpe yandi tubaka, “Oh, mbote.”

Mu tubaka, “Mu lendaka vwanda?”

Yandi tubaka, “Mu kele na bantu.”

70 Mu tubaka, “Mu zola tuba yawu mutindu yina ve, mama. Mu ke zola kaka kutuba na nge, ntangu fioti.”

Yandi tubaka, “Vwanda.”

71 Mpe mu tubaka, “Mama, na mwa minuti fioti me luta, mu vwandaka ya kutelama na manima ya kielo yina. . .” Mu bandaka na kutuba na yandi. Mpe na yina mu bandaka na kutala, masa ya meso bandaka na kukulumuka na matama ya yandi. Mpe tubaka na munu. . . Mu tubaka, “Mama, nge zola ve kusala mambu yayi. Yesu kufwaka, mpe balusambusu ya Nzambi kele ya kuvwanda ntama na nzila ya Menga ya Yandi. Nge zola ve kusala mambu yayi.”

72 Mpe yandi tubaka, “Ve, tata.” Yandi tubaka, “Tata ya munu vwandaka diacre na dibuundu. Mu me kula na dibuta ya Baklisto. Bakala ya munu mpe munu vwandaka bamambele ya mbandukulu, mpe vwanda zinga luzingu ya Baklisto.” Yandi bandaka na kutuba na munu, na manima ya lufwa ya yandi. . . Yandi vwandaka na bana-bakento zole ya bantwenia, mpe yandi zimbanaka nzila. Mpe mutindu bana-bakento yambulaka yandi, mpe yandi losaka luzingu ya yandi. Mpe yandi banzaka ti ya vwandaka diaka ve na kivuvu samu na yandi.

73 Kasi mu tubaka, “Nzambi, lemvo kila! ‘Bayina Yandi zabaka na ntuala, Yandi bokilaka bawu.’”

Yandi tubaka, “Nge kele Révérend Branham, yina ke vwandaka kuna?”

Mu tubaka, “Ya kele munu.”

74 Yandi tubaka, “Mu ke na nsoni ya munu mosi, na kuvwanda awa mutindu yayi.” Yandi tubaka, “Nge ke banza ti ya lendaka vwanda na siansi samu na munu?”

75 Mu tubaka, “Yesu me panza maboko ya Yandi, na kuvingilaka ti nge kwisa, mama.” Mpe bantu yankaka me banda na kutelama. Mpe mu tubaka, “Nge ke zola kubasika awa na ntoto yayi na munu?”

Yandi tubaka, “Mu zola, tata.”

76 Mu simbaka yandi na diboko. Mu tubaka, “Nge ke na bamvula pene ya mama ya munu. Nge zola kufukama awa na munu, na ntoto?” Mpe kuna na ntoto, beto kitulaka kisika yina na manima ya midi yina, na lukutakanu mosi ya mutindu ya ntama. Mpe Nzambi vulusaka kento yina, na lemvo ya Yandi. Yandi lwataka mpe yandi kwisaka na lukutakanu, mpe, mutindu

mu me zaba, yandi ke na kuzinga luzingu ya Baklisto na nkokila yayi.

⁷⁷ Yinki yina? Oh, Nzambi ke lomba kulunga! Yandi ke lomba kubalula ntima. Yandi ke lomba beno kuvwanda ya kwikama na Yandi. Kasi Yandi ke na kusosa na nkokila yayi. Ata yinki mutindu beno me sala masumu, ya fioti to ya mingi, beno kele kaka nsumuki, mpe beno lendaka kukota ve na nzila yankaka kasi na nzila ya Yesu Klisto, Munkayulu ya kulunga ya Nzambi. Mpe kati na Yandi beno me kuma ya kulunga kukonda nsuka. Beno banza na yawu! Ya ke na kima mosi ve beno ke sala. Ya kele ve matiti ya malu-malu beno ke zibula. Ya kele ve luzingu ya malu-malu beno ke banda. Ya kele kundima yimbi ya beno, mpe lemvo ya Nzambi na beno. Yina ke nata beno na kulunga, na yina beno ke kuma ya kulunga kati na Yesu Klisto.

⁷⁸ Mu ke na kivuvu, na nkokila yayi, nkundi ya munu, na ntangu beto kele awa na ntangu yayi ya nene ya kubaka lukanu na ntangu yayi, na yina balukanu fwana bakama na manima ya kuwa disolo yayi. Ntangu yankaka beno me kuwaka yawu ntete. Kasi beno lendaka ve kubasika na bielo yayi mutindu beno kotaka, beno fwana basika ya kulutila mbote to ya kulutila yimbi.

⁷⁹ Mpe na ntangu beto ke kulumusa bayintu ya beto na mwa ntangu fioti, mu ke zola ti beno fimpa mbundu samu na yawu. Wapi mutindu samu na moyo ya beno na nkokila yayi? Yesu Klisto kufwaka samu na beno.

⁸⁰ Beno ke tuba, “Mpangi Branham, ntangu mu ke yambula kunwa makaya, ntangu mu ke yambula kunwa malafu, ntangu mu ke sungama na diambu yayi, mu ke sala yawu.” Oh, ya ke salama ata fioti ve ya kulunga. Beno ke vwanda ata fioti ve na kiyeka ya kusala yawu. Samu na yinki beno ke kwisa ve mutindu beno kele? Mpe, na nzila ya lukwikilu, beno kwenda na Masa yango, yina ke na kubasika na bamputa, na yina zola ya mpulusu ke vwanda diambu ya beno, mpe ya ke vwanda tii ntangu beno ke kufwa.

⁸¹ Samu na yinki kubaka kiyingilu? Samu na yinki kumeka na kukota na nzila ya dibuundu? Samu na yinki kukwisa samu beno me yambula kunwa malafu to beno me yambula kuvuna? Beno kwisa na nzila ya kulunga! “Samu, na nzila ya Munkayulu mosi, Yandi me kumisa ya kulunga kukonda nsuka bayina me santisama.”

“Wapi mutindu mu me kuma ya kusantisama?”

⁸² Beno fungula masumu ya beno na Ntwala ya Menga ya Yesu; mpe Luzingu yina me katuka na Menga yina, ke kwisa na musambidi, mpe ke santisa yandi na bansatu ya bima ya yinza. Samu, na nzila ya Munkayulu yina ya kulunga, Yandi me santisa beto; na Mpeve mosi, beto me botama na Nzutu mosi. “Ntangu yayi ya ke na lufundusu ve samu na bayina kele kati na

Klisto Yesu, samu na bayina ke tambula ve landila nzutu, kasi na Mpeve.” Kana beno ke meka na kutambula na Mpeve, mpe beno ke lula kaka mambu ya nzutu, Munkayulu me sala ntete ve kisalu ya kieleka na beno. Kasi na ntangu musambidi me kuma ya kuvedila mbala mosi, yandi kele diaka ve na nsatu ya disumu.

⁸³ Yawu yina Calvaire vwandaka. Ya ke kisika ya kutekisa bafololo ve, to mwa kisika ya kusala *yayi to yina*. Ya vwandaka kisika yina Nzambi na muntu wisanaka. Ya vwandaka kisika yina lukengolo ya ngemba mpe ya kulunga kwisaka na bantu. Beno lenda kwenda na munu, na nkokila yayi, nkundi ya munu ya nsumuki, na Calvaire, mpe na nzila ya lukwikilu kutula Menga yayi na moyo ya beno, mpe kubika Mpeve-Santu kukwisa mpe kusantisa beno na nzila ya Munkayulu ya Yandi ya nene?

⁸⁴ Na ntuala beto kusambila, beno lenda telemisa diboko ya beno na Nzambi, mpe kutuba, “Lemvokila munu, Nzambi. Mu ke fungula ntangu yayi masumu ya munu, na nkokila yayi ya Kilumbu ya tanu ya Santu. Mpe mu me sepele na mpasi yina ya nene ti Klisto kufwaka samu na munu. Mu ke yambula ntangu yayi luzolo ya munu, bamitifi ya munu mosi mpe nionso, samu na kulanda Nge kubanda bubu yayi, tuka ntangu yayi.” Beno zola telemisa diboko ya beno, samu na kutuba, “Bambuka moyo na munu, Mpangi Branham, na kisambu. Ya kele lukanu ya ntima ya munu”? Ya kele na mosi, na nkokila yayi ya nene, na ntangu beto ke vingila na mwa ntangu fioti? Awa na diboko ya munu ya kibakala, ya kieleka ya ke na mosi kuna. Beno ke na nsoni ya masumu ya beno? Beno ke na nsoni samu na yina beno me sala?

⁸⁵ Yinza na nkokila yayi ke na kusosa ba-hero. Mpe ya ke na ba-hero, na mutindu ya nzutu.

⁸⁶ Kilumbu mosi kuna na Suisse, ntangu ba nwanisaka Suisse, mwa parti mosi ya Suisse kuvukanaka kuna na bilanga, samu na kunwanina—kunwanina mumbungu ya bawu. Makesa yina vwandaka kwisa vwandaka nene mingi samu na bawu; bawu nionso vwandaka ya kulonguka, ba vwandaka na madionga ya nene mpe binwaninu ya bisengo. Swiss lendaka sala kima mosi ve kasi kuyambula. Ba kwendaka bumbama na manima ya mongo mosi. Kuna ya vwandaka na hero mosi kubasikaka. Ya lombaka ti muntu mosi kufwa. Mpe kana ba me nunga ve bitumba . . .

⁸⁷ Ba vwandaka na kima mosi ve kasi balutebu ya basansi, mpe matadi, bayinti, samu na kunwana na yawu. Na yina, makesa yina vwandaka kwisa monanaka mutindu kibaka ya baliki. Kana ba nungaka bawu, ba zolaka baka bakento ya bawu ya luzolo na ngolo, ba zolaka baka na ngolo bana ya bawu ya fioti ya bakento, ba zolaka kufwa ba-bébé ya bawu, ba zolaka kupanza bayintu ya bawu, ba zolaka kupanza bayinzo ya bawu, bima nionso zolaka kuzimbana.

⁸⁸ Na yina ya vwandaka na muntu mosi, yina ba me zimbana nkumbu ya yandi na nswalu nionso, na nkumbu ya Arnold von Winkelried. Yandi kwisaka, mpe yandi tubaka, “Bantu ya Suisse, bubu yayi mu ke pesa luzingu ya munu samu na Suisse.” Yandi tubaka, “Kaka kuna na manima ya mongo ya kele na mwa yinzo mosi ya mpembe. Mu ke na kento mosi na bana tatu ke na kuvingila munu. Kasi ba ke mona munu diaka ve, samu, bubu yayi mu ke pesa luzingu ya munu samu na Suisse.”

Bawu tubaka, “Yinki nge ke sala, Arnold von Winkelried?”

⁸⁹ Yandi tubaka, “Beno landa munu, mpe beno sala nionso beno lendaka sala na yina beno ke na yawu.”

⁹⁰ Mpe yandi talaka kuna na makesa tii yandi monaka mosi ya madinga ya kulutula nene. Na yina yandi zangulaka maboko ya yandi na zulu, yandi kimaka mbangu na ntwala ya kibaka yina ya nene ya biliki ya madinga, mpe yandi bokaka, “Beno sala nzila ya kimpwanza! Beno sala nzila ya kimpwanza!” Madinga nkama mosi balukaka samu na kusimba yandi; yandi panzaka maboko ya yandi mpe yandi yambaka yawu na ntulu ya yandi, yina tobolaka yandi, mpe yandi kufwaka na nsongi ya madinga yina. Ba-Suisse yina landaka yandi na bitini ya bayinti mpe bayinti. Kifwani yina ya nene ya ba-hero vwalangisaka makesa yina, na yina ba-Suisse bulaka bawu na nganda ya yinsi. Mpe ba vwandaka diaka ve na mvita kubanda kilumbu yina, kubanda na ntangu yina.

⁹¹ Beno telama na Suisse mpe beno tuba nkumbu ya Arnold von Winkelried, beno ke mona masa ya meso ke kulumuka na matama ya bawu. Samu na yinki? Yandi vulusaka yinsi ya bawu. Yina vwandaka diambu ya nene ya ba-hero. Ba lendaka fwanikisa yawu kieleka ve, mpe mosi ve me luta yawu, na ntoto yayi.

⁹² Kasi, oh, ya vwandaka na mwa kima mosi yina salamaka kilumbu mosi! Ntangu dikanda ya Adam telemaka, bampeve ya yimbi vwandaka tambula sika na sika, bapofete kubwaka, musiku kubwaka, munkayulu ya bangombe mpe bana-mameme kubwaka, nkadulu ya muntu kubwaka, bima nionso. Mpe mwa dikanda ya Adam telamaka, ya kunungama; ya kulutula na ntalu na bampeve ya yimbi, binzambi-nzambi, bimbevo, maladi. Ya vwandaka na Mosi katukaka na Zulu, mpe tubaka, “Bubu yayi mu ke kufwa samu na dikanda ya Adam.” Yandi kwisaka na ntoto mpe kumaka muntu. Yandi talaka na kati-kati ya madingo ya kulutula mudidi. Mudidi ya kulutula nene ya boma ya muntu nionso vwandaka lufwa, mpe Yandi bakaka lufwa na ntulu ya Yandi. Mpe na Calvaire Yandi futaka munkayulu, mpe yandi bokaka, “Beno sala nzila samu na Kimpwanza!”

⁹³ Mpe Yandi ke boka na Dibuuundu ya Yandi, “Beno baka Yayi Mu me bika samu na beno, Menga ya Munu mpe Mpeve ya Munu, mpe beno nwana na nionso yina beno ke na yawu.” Beto lenda

nunga na nkokila yayi, na nzila ya Yawu, nkundi. Beno lendaka kupusa diabulu ntama ya beno. Mbeni nionso ya ntama yina kele na luzingu ya beno, ya lendaka basika na Menga mpe Mpeve ya Klisto, mpe beno lendaka telama ya kulunga na Ntwala ya Yandi. Klisto me sala nzila!

⁹⁴ Beno lendaka telemisa diboko ya beno na Yandi, mpe kutuba, “Lemvokila munu”? Nzambi sakumuna nge, mpangi-bakala. Muntu yankaka, “Lemvokila munu, Nzambi, mu ke fungula ntangu yayi bayimbi ya munu yayi”?

⁹⁵ Ya ke na bamambeke ya dibuundu yina kele tiya ve madidi ve yina ke kwendaka na yinzo-Nzambi konso kilumbu, mpe ntangu yankaka yina ke mekaka na mutindu nionso na kuvwanda ya busantu, kasi beno zaba ti nganzi mpe kukondwa kukipe mambu, mpe muyimi, bikalulu me kanga beno na mutindu ti beno kele na lunungu ve? Beno zola ti Menga kusukula beno, na nkokila yayi, na nionso yina? “Samu na ntangu yina musambidi me kuma ya kuvedila mbala mosi yandi ke vwanda na konsiansi diaka ve. . .” Beno zola kutelemisa diboko ya beno, beno mambele ya dibuundu? Nzambi sakumuna nge, mama. Beno telemisa maboko ya beno mpe beno tuba, “Mpangi Branham, bambuka moyo na munu na kisambu.” Nzambi sakumuna nge, mama. Ya kieleka. Yina kele kieleka . . . Yina kele kima ya mbote ya kusala. Nzambi sakumuna nge kuna na manima, tata.

⁹⁶ Muntu yankaka telemisa diboko ya nge, tuba, “Lemvokilaila munu, Nzambi. Mu zaba ti mu ke ndimaka Buklisto, kasi mu ke zingaka yawu ve. Mu zaba ti mu ke zingaka yawu ve. Mpe na kati ya ntima ya munu, ya kieleka mu kele ya kusungama na Nge ve. Mu ke zola kuvwanda mosi ya basoolami ya Nzambi. Mu ke na nsatu na ntima ya munu ti mu kele, kasi mu me tulaka ata fioti ve na lweka bizitu yina ke nwanisa munu. Mpe mu ke zola kutula yawu na lweka na nkokila yayi. Mpe, na lemvo ya Nzambi, mu ke sala yawu. Sambila samu na munu.” Beno zola telemisa diboko ya beno? Nzambi sakumuna nge, mama. Muntu yankaka. Beto ke vingila, na mwa ntangu fioti.

⁹⁷ Na ntangu beto ke na kuvingila na pima nionso, muntu nionso ntangu yayi na bayintu ya beto ya kukulumusa na kisambu, na malembe beno yimbila yayi na yinwa ya kukanga ntangu yayi.

Kele na Yinto mosi ya kufuluka na Menga,
Yina basikaka na Misisa ya Emmanuel,
Mpe nsumuki nionso ke kota kuna . . .
Ya ke zimbisa kubwa ya yandi, ya ke
zimbisa . . .

⁹⁸ Beno zola banza na yawu ve kaka na ntangu yayi? Beno meka ve na kusukula yawu. Klisto kele na maboko ya beno.

⁹⁹ Pilate mekaka yawu, na suka yayi, na ngunga ya sambanu na suka; kasi maboko ya yandi kele diaka na menga, ya kubwa

na menga. Beno zaba yina kumaka na yandi. Yandi kwendaka na Suisse, bamvula mingi na ntwala, yandi zimbisaka mabanza ya yandi, yandi kukifwaka yandi mosi na kati ya kiziba ya masa. Na suka yayi, na Suisse, bankama ya bantu ke kwisaka kutala diambu yango, masa ya blue ke basikaka na dibulu yina ya nene ya masa. Ba ke salaka yawu konso mvula. Ya kele disolo mosi ya ntama, ba ke tubaka ti Nzambi pesaka muswa ve ti masa kusukula maboko ya yandi.

¹⁰⁰ Mpangi-bakala, ata yinki mbala yikwa ba me botikaka beno, ya vwanda nionso yina beno ke meka na kusala, kima mosi ve ke sukula maboko ya beno kasi Menga ya Klisto. Nzambi mangaka yawu. Mpe masa ya blue, na manima ya bamvula mafunda zole, ntama ve, ke na kulandila na kutoka. Nzambi mangaka yawu. Kusungama ya beno mosi lendaka ve kusukula masumu ya beno. Kima mosi ve kasi Menga ya Yesu! Beno banza na yawu ntangu yayi. Beto ke sambila, na mwa ntangu fioti.

¹⁰¹ Mu ke kukiyufula kana mu lendaka yufula kima mosi na nkokila yayi. Ntangu Yandi telemaka kuna na kivinga ya lusambusu ya Pilate, na suka yayi, mpe tubaka, “Kana Kimfumu ya Munu vwandaka ya yinza yayi, Mu zolaka tuba na Tata ya Munu mpe na mbala mosi Yandi zolaka fidisa na Munu bimvuka kumi na zole ya Bawanzio.” Na yina, mosi ya bawu lendaka bebisa yinza. “Mu zolaka tuba na Yandi, mpe bimvuka kumi na zole ya Bawanzio zolaka vwanda na nsi ya luzolo ya munu.” Yandi lendaka sala yawu. Kasi Yandi telemaka kuna, swi mpe ya kukikulumusana, samu na kubaka lufwa ya beno mpe kubaka masumu ya beno.

¹⁰² Beno zola kuvutula matondo mingi samu na munkayulu yina na nkokila yayi, beno yina kele na nsatu ya yawu, mpe beno yina kele na nsatu ya masakumunu ya Nzambi, beno zola telama samu na kisambu yayi? Beno telama kaka, beno yina zola ti ba bambuka beno na kisambu yayi, na kutubaka, “Nzambi, lemvokila munu. Mu me kubwa, mu me sala mambu ya yimbi, mpe mu ke zola ntangu yayi kundima pardo ya munu na nzila ya Klisto Yesu.” Beno zola kwisa na ntangu yayi? Nzambi sakumuna nge, mama ya ntwenia. Ya ke kikesa. Beno bikala ya kutelama kuna.

¹⁰³ Beno zola tuba na munu ti beno me telemisa diboko ya beno, mpe na manima beno kele ve ya kusungama kieleka samu na kutelama? Wapi mbote Nsangu ya mbote me sala na beno? Oh, ya ke monana kusakana na dibuundu, kusakana na Nzambi! Ngunga me kuma na nsuka, mosi ya bilumbu yayi bombe atomique ke bula kisika mosi awa, na mosi ya basine ya poudre. Ya ke vwanda ve na kitini sekonde samu na kubanza na yawu. Ntangu ke vwanda me luta na ntangu yina, mpe ntangu yankaka na ntwala ya Paki yina ke kwisa, to ata mpe na Paki yayi. Beno zola ve kutelama na ntangu yayi, samu na kutuba, “Nzambi, lemvokila munu, nsumuki. Mu me

ndima Klisto ntangu yayi, na kukipesaka Yandi mosi mutindu munkayulu samu na masumu ya beto. Mpe na lemvo ya Yandi, mpe lemvo ya Yandi kaka, mu ke vwanda na Ntwala ya Nzambi.” Beno zola kufungula bayimbi ya beno? Yandi yina ke bumba masumu ya yandi ke kwenda na ntwala ve. Yandi yina ke ndima masumu ya yandi, ke kuzwa mawa. Ya me tala na beno. Yandi ke na kutala.

¹⁰⁴ Ntangu yayi, Mfumu ya beto ya Kusakumuka, na numéro yayi ba me baka na nkokila yayi ya ke na mioyo tatu kele na kiadi, bakala mosi na bakento zole.

¹⁰⁵ Mutindu mu ke banza, Mfumu, na Calvaire, ntangu mosi yina vwandaka na lweka mosi, tubaka, “Mfumu, bambuka moyo na munu ntangu Nge ke vwanda na Kimfumu ya Nge”; mosi na lweka yina yankaka tubaka, “Kana ya kele Nge, bika ti beto kumona kimangu mosi, katula beto na kulunsi mpe kukivulusa Nge mosi.” Mpe yina yankaka tubaka, “Nzambi, lemvo kila munu.” Mpe Nge balulaka yintu na lweka ya kibakala, mpe tubaka, “Bubu yayi nge ke vwanda na Munu na paladiso.” Kasi Nge vwandaka swi samu na yina yankaka, samu yandi balulaka ntima ya yandi ve.

¹⁰⁶ Mpe, Tata Nzambi, mu ke sambila ti ntangu yankaka . . . Mu ke tula kivuvu ti kaka bawu tatu na kati ya kivinga, yina ke kuwa ti bawu kele na nsatu ya kufungula bayimbi ya bawu. Kasi ba me kwisa ve na nzila yina kele ya kulunga, na nzila ya kulunsi. Lemvokila bawu, Mfumu, mpe sakumuna bawu. Ba me telama awa na nkokila yayi; mutindu Nge telemaka samu na bawu, na kivinga ya lusambusu ya Pilate; mutindu Nge telemaka samu na bawu, kati-kati ya Mazulu na ntoto, ntangu mwini dindaka mpe ngonda mangaka na kupesa nsemu ya yandi, mpe vwale ya tempelo pasukaka kubanda na zulu tii na nsi. Mu ke sambila, Nzambi, ti Nge ke sakumuna bawu mpe Nge ke pesa bawu mawa ya Nge, mpe Nge ke sukula bawu na Menga ya Nge. Mpe botika bawu na Ngolo ya Nge ya busantu, kati na Nzutu ya Mwana ya Nge Mosi, Klisto Yesu, na yina ba me kebama na ntangu mpe Kukonda nsuka. Sakumuna bayankaka yina kele na nsatu ti bawu kele ya kusungama, ti ba me kutana dezia na yayi mpe ba me sala yawu. Mu ke lomba lusakumunu yayi samu na bawu, na Nkumbu ya Klisto. Amen.

¹⁰⁷ Nzambi sakumuna beno. Mpe beno yina kele pene-pene ya bayina me telama, beno tanda diboko mpe beno pesa bawu mbote, muntu mosi, mpe beno tuba, “Mfumu sakumuna nge,” ya kieleka, mutindu diboko ya kimpangi.

¹⁰⁸ Beto kele ntangu yayi na mwa nsukinina na bisalu ya beto. Bantu yikwa ke zolaka Mfumu Yesu, beno telemisa diboko ya beno? Mu ke kukiyufula, na pima ntangu yayi, to swi mutindu beto lendaka vwanda, samu na kubanza na Yandi Yina kele

bisika nionso, yina kele awa na nkokila yayi, kana beto lendaka yimbila na pima nionso.

Ya vwandaka kuna kulunsi kisika Mvulusi ya
 munu kufwaka,
 Mu me kwisa kuna samu na kudila masumu ya
 munu;
 Kuna na ntima ya munu (ntangu beno me zitisa
 yina ba me lomba, beno me tetika maboko
 ya beno na zulu ya Yawu), kuna na ntima ya
 munu Menga kele;
 Oh, nkembo na Nkumbu ya Yandi!

Beto yimbila na pima nionso ntangu yayi, na yina beto ke kulumusa banyintu ya beto na Yandi.

Na kulunsi sika wapi Mvulusi ya munu
 kufwaka,
 Mu me kwisa kuna samu na kudila masumu ya
 munu;
 Kuna Menga ya yandi pakulamaka na ntima ya
 munu;
 Nkembo na Nkumbu ya Yandi!
 Nkembo na Nkumbu ya Yandi, Nkumbu ya
 ntalu!
 Nkembo na Nkumbu ya Yandi ya ntalu!
 Kuna Menga ya yandi pakulamaka na ntima ya
 munu;
 Nkembo na Nkumbu ya Yandi!

¹⁰⁹ Na pima nionso ntangu yayi, na bayintu ya beto ya kukulumusa. Beno yina me vuluka, beno tuba, “Oh. . .” Beno telemisa maboko ya beno ntangu yayi.

Oh, Yinto ya ntalu yina ke vulusaka na
 masumu!
 Mu ke na kiese mingi na kukota kuna;
 Kisika Yesu ke vulusa munu mpe ke keba munu
 kukondwa mvindu;
 Nkembo na Nkumbu ya Yandi!
 Nkembo na Nkumbu ya Yandi ya ntalu!
 Nkembo na Nkumbu ya Yandi ya ntalu!
 Kuna Menga ya yandi pakulamaka na ntima ya
 munu;
 Nkembo na Nkumbu ya Yandi!

¹¹⁰ Ntangu yayi na maboko ya beno ya kukulumusa, bayintu ya beno ya kukulumusa. Mu ke banza; muntu mosi me bokila na ntangu fioti me luta, mpe yandi me tuba ti muntu mosi ke zola ti ba bambuka yandi na kisambu na nkokila yayi, samu na nzutu ya bawu. Ba lendaka vutuka ve na lukutakanu ya Lumingu na nkokila, samu na lukutakanu ya nene ya kubeluka ya nzutu.

Beno lendaka telama, beno yina ke zola ti ba bambuka beno na kisambu na ntangu yayi?

. . . na ntima ya munu Menga kele;
Nkembo na Nkumbu ya Yandi!
Nkembo na . . .

¹¹¹ Ntangu yayi na bayintu ya beto ya kukulumusa. “Yandi lwalaka samu na masumu ya beno, ba tobolaka yandi samu na masumu ya beno ya nku, kitumbu yina ke pesaka ngemba kubwaka na zulu ya Yandi, mpe na bamputa ya Yandi beno me beluka.”

Nkembo na Nkumbu ya Yandi!

¹¹² Ntangu yayi, Tata ya Lusakumunu, mutindu beto ke belama na kulunsi na kukikumusa na ntangu yayi, kisika lemvo mpe mawa kuzwaka munu, kisika Mbwetete ya Nsemo mpe ya Suka ke fidisa bansemo ya Yandi na nziunga ya munu. Bambevo yayi me telama na Ntwala ya Nge. Ba ke kwikila na ntangu yayi, ti na lukwikilu, ba ke tala na mukongo yina ya bamputa, kuna. “Mpe na bamputa ya Yandi beto me beluka.” Tata ya kulutila Santu, beto me kwisa na kundimaka lukwikilu ya beto, na kukwikilaka ti Nge ke belusa banzutu ya beto, na nzila ya lutumu ya mpasi ya nene ya Mfumu Yesu. Mpe beto ke kaba samu na bantu yayi kele ya kutelama, kisambu ya lukwikilu, yina Nge silaka ke vulusa bambevo. Mpe beto, kintwadi, mutindu kimvuka ya bakwikidi ya Nge na nkokila yayi. Nge tubaka, “Kisika zole to tatu me vukana, Mu ke vwanda na kati ya bawu.” Mpe beto ke lomba mawa samu na bawu, ti lemvo ya Nge lendaka ntangu yayi kusimba moyo ya bawu ya kati, ti kima mosi ke kota kuna na kati-kati; ti ba ke zaba ti Klisto kele awa mpe Yandi me tuba na bawu, na kutubaka, “Mwana ya Munu, Mu bakaka bimbevo ya nge kuna na Calvaire. Ntangu yayi beno tula minianga ya beno nionso na zulu ya Munu, samu Mu ke kebaka beno.” Mpe bika ti bawu kubeluka, bampeve nionso, samu beto ke lomba yawu na Nkumbu ya Yesu. Amen.

¹¹³ Mpe mutindu ba ke vwanda ntangu yayi, muntu yina kele pene-pene ya bawu, beno tetika maboko ya beno na zulu ya bawu, muntu mosi ke sambila samu na bawu. Biblia me tuba, “Ba ke tetika maboko ya bawu na zulu ya bambevo; ba ke beluka.” Mfumu kusakumuna.

¹¹⁴ Kana mu me zimbana ve, mu ke tala bakala yina belukaka awa bilumbu zole to tatu me luta, to Balumingu zole to tatu me luta, yina vwandaka kifwa-makutu to yina vwandaka na kima mosi na makutu ya yandi? Mu ke mona ti beno me sepela na lukutakanu ya nkokila yayi. Beno ke kuwa munu mbote ntangu yayi? Ya ke mbote. Ya ke kitoko! Beno telama na mwa ntangu fioti. Bantu yikwa ke bambuka moyo ti yandi vwandaka awa? Mpe yandi lutaka na ndonga ya bisambu, ba nataka yandi kuna na estrade, mpe Mfumu belulaka yandi mpe yandi kumaka

mbote. Mfumu kusakumuka! Matondo na nge, mpangi-bakala, samu na kimbangi ya nge. Ya lendaka vwanda na makumi! Kasi Yandi kele mbote ve?

¹¹⁵ Ntangu yayi, beto ke zola kumona beno mbasi na nkokila, na ntangu ya mbote. Na manima na Lumingu na suka, na ntangu ya mbote. Lumingu na manima ya midi, mpe kana beno lenda vutuka samu na lukutakanu ya kubeluka ya nzutu na Lumingu na nkokila. Tii na ntangu beto ke kutana, bika beto telama mpe beto yimba nkunga ya beto ya kukabwana, “Baka Nkumbu Ya Yesu Na Nge.”

Baka Nkumbu ya Yesu na nge,
Nge mwana ya mawa mpe ya kiadi;
Ya ke pesa nge kiese mpe kikesa... (Beno
baluka mpe beno pesa mbote na bantu
nionso.)

Bisika nionso Yawu ke kwenda.

Nkumbu ya ntalu, (beno baluka mpe beno pesa
mbote) Oh, ya ke kitoko!

Kivuvu ya ntoto mpe kyese ya Mazulu;
Nkumbu ya ntalu, Nkumbu ya ntalu, Oh ya ke
kitoko! Ya ke kitoko!

Kivuvu ya ntoto mpe kyese ya Mazulu.

Ntangu yayi beno tala na lweka yayi.

Beto ke fukimina Nkumbu ya Yesu,
Beto ke fukama na makulu ya Yandi,
Samu na kubyadisa Yandi ntinu ya bantinu na
Mazulu,

Ntangu nzietolo ya beto ke suka.

Nkumbu ya ntalu, Oh ya ke kitoko! Oh ya ke
kitoko!

Kivuvu ya ntoto mpe kyese ya Mazulu;
Nkumbu ya ntalu, Oh yawu kele mbote! Yawu
kele mbote!

Kivuvu ya ntoto mpe kyese ya Mazulu.

¹¹⁶ Ntangu yayi beno bambuka moyo na chorale ya Neville, na nsamununu ya yiya na suka, WLRP, na ngunga ya yivwa. Mpe Mpangi Stricker ke kwisa na ngunga ya yivwa na minuti makumi yiya na tanu, na Lumingu na suka. Beto vwandaka sala bande samu na yandi na manima ya midi yayi, na zulu ya mvumbukulu.

¹¹⁷ Mpe ntangu yayi, tii na ntangu beto ke kutana diaka, masakumunu ya Mfumu kuvwanda na beno, na yina beto ke kulumusa bayintu ya beto. Mpe mu ke lombi na nkundi ya munu ya mbote mpe mpangi-bakala, Mpangi Palmer, ya Macon, na Georgie, kana yandi zola kuyambula bantu na mpova ya kisambu, na yina beto ke sambila. Mpangi Palmer.



KULUNGA KNG57-0419
(The Perfection)

BANDANDANI YA REVEIL YA PAKI

Nsangu yayi ya Mpangi William Marrion Branham, kulongamaka na Kingelesi, na nokola ya Kilumbu ya tanu ya Santu, na kilumbu ya 19 na Ngonda ya yiya, na mvula 1957, na Branham Tabernacle na Jeffersonville, Indiana, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2021 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org